

# O Dujto Poslanie taro Jovan

## Pozdrav

**1** <sup>1</sup> Taro starešina, džiki izbirimi gospogja hem olakere čhave, koj mangavalen ko čačipe, hem na samo me, nego hem sarine, koj pendžarge o čačipe, <sup>2</sup> baši o čačipe, so ačhola ki amende hem so ka ovel amencar dovek. <sup>3</sup> O blagodat, o milost hem o mir ka oven amencar taro Devel o Dat hem taro Gospodari o Isus Hristos, o Čhavo e Dadeskoro, ko čačipe hem mangipe.

## O zapoved e mangipaskoro

<sup>4</sup> But radujngjuma soske maškar te čhave arakhljum asavke, koj džana ko čačipe, sar so primingem zapoved taro Dat. <sup>5</sup> Hem akana molinavatut gospogjo, na sar te pišinava tukje nevi zapoved, nego okoja so isiamen taro početok: te mangamen jek javereja. <sup>6</sup> A mangipe tano akava: te dža spored Oleskere zapovedia. Odojaj tani i zapoved, sar so šungen taro početok, ki koja trebela te džan.

## Pazinen tumen

<sup>7</sup> Soske but izmamnikja iklile ko sveto, koj na ispovedinena deka o Isus Hristos alo ko telo; odovaj tano izmamniko hem antihrist. <sup>8</sup> Pazinen tumen tena našaven okova so spečalingemle, nego te priminen celo nagrada. <sup>9</sup> Sekoj, koj džala nadarik hem na ačhola e Hristoske ki nauka, naele e Devle. Koj ačhola e Hristoske ki nauka, ole isile hem e Dade hem e Čhave.

<sup>10</sup> Ako nekoj alo ki tumende hem na anela akaja nauka, ma priminenle ko kher hem ma pozdravinenle; <sup>11</sup> soske koj pozdravinelale, učestvinela ko oleskere bilače dejlja.

## Pozdravia

<sup>12</sup> Isiman but te pišinav tumenge, ama na mangava lileja hem mastilo, nego nadinavama deka ka avav tumenge hem usno te kjerav lafi tumencar, za da te ovel amari radost pherdi. <sup>13</sup> Pozdravinenatut o čhave tari ti izbirimi phen. Amin!